

Carta naçahyí Pablo nuú Filemón

Chíndahá Pablo Ndióxi coo Filemón

¹Yehe cúú u Pablo ta ndácaan i vecaa yóho saha ña cúú u cuénta Jesucristo. Yehe xihín Timoteo, ñani í, da cúú cuénta Jesús cáhyí nde carta yóho nu mún, Filemón. Quíhvi ini nde yohó ta in cúún xihín nde saha ña cája chúún cuénta Jesucristo. ²Ta jári cáhyí nde carta yóho nuú na cúú cuénta Jesús táca vehún jan xihín nu Apia, ña cúú quiahva í saha ña cándeé ini ña Jesús. Ta quiahva já cáhyí nde carta yóho nu Arquipo jáchi in cúú da ndóho ini da cája chúún da cuénta Jesucristo. ³Ndióxi, tátá yo xihín Jesucristo, xitoho í ná caja cuahá ñamaní xihín ndo ta ná caja ña ná coo vaha ini ndó.

Cándeé cáhnu ini Filemón Jesucristo

⁴Tá xíca tahví i nu Ndióxi sahún co ndíndójó i ndiquiahva i ndixahvi nu mé á saha mún. ⁵Jáchi nañehé e tūhun ña cándeé inún Jesucristo, xitoho í ta quíhvi inún mé á xihín ndihi na cúú cuénta mé á. ⁶Ta xíca tahví i nu Ndióxi ña ná ndicanún nuú java ñayivi ndá quiahva cándeé inún mé á. Ta xihín ña yóho cuu canda vaha ini na ndaja náhnu ñamaní cája Ndióxi xihín tóco ndihi mí, na cándeé ini Jesucristo. ⁷Cájii ini i ñani mí i ta sáhan tūhun ndeé ini i jáchi quíhvi inún na cúú cuénta Jesús. Ta jári sáhan tūhun ndeé ini cuahá na cúú cuénta Jesús jáchi quíhvi inún na.

Xíca Pablo ñamaní nu Filemón saha Onésimo, da naheen Filemón caja chúún nu dá

⁸Yehe cúú u in apóstol Jesucristo ña cán quéa íin saha i cahnda i chuun nuun cajún ña ndítahan nuun cajún. ⁹Joo co cája i ña. Ña cája i quéa xíca i ñamaní nuun jáchi quíhvi ini i yohó. Xíní núhú ndicuhun inún ña cúú u Pablo, da sáhnu, da ndácaan vecaa saha Jesucristo. ¹⁰Ta viti xíca i ñamaní nuun saha Onésimo, da nanduu tátūhun jahyi mí i cuénta Jesús nani ndácaan i vecaa yóho.

¹¹Jihna ga nasacuu Onésimo da coó chuun nuun joo viti íin chuun da nu ndíví yo. ¹²Ta viti chíndahá i da nuun. Ndiquehe vahún da saha mí i jáchi

FILEMÓN

quíhvi ndivaha ini i da. ¹³Cúni ña ná candoo da yóho xihín i já ná cuu chindeé da yehe nu mún. Jáchí ndácaan i vecaa yóho sahá ña cáhan i tuhun vaha sahá Jesucristo nuú ñayivi. ¹⁴Joo nasacu ini i chindahá i da nuun jáchi tiahva náá a váha cúu inún xihín i tá ná candoo da yóho xihín i. Jáchí tá ná cajún ñamani xihín i cúni ña ná caji inún cajún ña ta co cúni caja ndúsa i xuhun. ¹⁵Cája i cuénta nacaxoo too Onésimo nuun joo viti ndicó coo da ná coo da níi tiempo xuhun. ¹⁶A cája gaún cuénta ña cúu dá da naxeún. Joo vaha chága viti jáchi cúu da ñani máni yohó cuénta Jesucristo. Quíhvi ndivaha ini i da joo xíní ñúhú quíhvi ini chágun da jáchi cája chúun da nuun ta cúu da ñanún cuénta Jesús viti.

¹⁷Ta tá mé a ndaa quíhvi inún yehe já quea ndiquehe vahún da tá quiahva ndiquehe vahún yehe tá ná xinu coo i nu iún jan. ¹⁸Ta tá nacaja da in cuachi nuun á tá yícá da nuun já quea ndacún ña nuú i ta já chahvi i sahá. ¹⁹Yehe cúu u Pablo ta cáhyi i ña yóho xihín ndáha i já ná candaa inún ña sáhan i tuhun i nuun ña chahvi i ña. Xíní ñúhú ndicuhun inún ña yícún nuú i jáchi nandihvún íchi cuénta Jesús sahá tuhun nacahan i xuhun. ²⁰Inga tucu xíca i ñamani nuun ña ná ndiquehe vahún Onésimo jáchi cúun ñani mí i, da cúu cuénta Jesús. Tá ná cajún ña yóho sahá ña cándéé inún mé á já quea quiahvún tuhun ndeé ini i.

²¹Cándaa vaha ini i ña cajún ña xíca i nuun cajún sahá ña cán quea cáhyi i carta yóho nuun ta cándaa ini i ña yaha chága cajún nuú ña xíca i nuun. ²²Inga tucu xíca i ñamani nuun ña ná caja tiahvún in vehe loho nuú coo i. Jáchí sahá ña xíca tahví ndihi ndó nu Ndióxi ña ná saa i coto nihni i ndohó sahá ña cán quea cája i cuénta caja mé á ñamani xihín i saa i jan.

Ndíndayí Pablo Filemón

²³In da naní Epafra, da ndácaan vecaa xihín i saha Jesucristo chindahá da Ndióxi coún. ²⁴Chindahá Marcos xihín Aristarco xihín Demas xihín Lucas Ndióxi coún. Mé na yóho cája chúun na xihín i cuénta Jesucristo.

²⁵Ná caja Jesucristo, xitoho í cuahá ñamani xihín ndihi ndó, na ndúu jan. Já ná coo.